



مجلس ائمة اسلام ملاك
MAJLIS AGAMA ISLAM MELAKA

POLISI PEMBERIAN DAN PENERIMAAN HADIAH

upgrade IMAN

upgrade INTEGRITI

EDISI 2022

UNIT INTEGRITI, MAJLIS AGAMA ISLAM MELAKA
Kompleks Pusat Islam, Bukit Palah, 75400, Melaka.

Telefon : 06 - 283 7416 | E-mel : integriti@maim.gov.my | Faksimile : 06 - 288 2792

ISI KANDUNGAN

BIL	TAJUK	MUKA SURAT
1.0	LATAR BELAKANG	1
2.0	KENYATAAN POLISI	1
3.0	TUJUAN	1
4.0	DEFINISI	2
5.0	SKOP	4
6.0	LARANGAN PEMBERIAN DAN PENERIMAAN HADIAH	4
7.0	HADIAH YANG BOLEH DITERIMA OLEH KAKITANGAN MAIM DENGAN KEBENARAN	5
8.0	BENTUK, AMAUN ATAU NILAI HADIAH SEPADAN ATAU TIDAK DENGAN MAKSUD IANYA DIBERI	5
9.0	PENERIMA HADIAH YANG SUKAR DITOLAK	7
10.0	PENERIMAAN HADIAH YANG MENJADI KESALAHAN	8
11.0	PENAJAAN DARI PIHAK SWASTA UNTUK MAIM	9
12.0	PENERIMAAN HADIAH DAN SUMBANGAN OLEH KELAB KEBAJIKAN DAN REKREASI (KADAR)	10
13.0	PUNGUTAN DERMA OLEH KESATUAN/PERTUBUHAN	11
14.0	KEPUTUSAN SETIAUSAHA MAIM	12
15.0	TANGGUNGJAWAB PSU BAHAGIAN/KETUA SEKSYEN/KETUA UNIT	13
16.0	PEMBERIAN CENDERAHATI DARIPADA MAIM KEPADA PIHAK LUAR	13
17.0	TARIKH KUATKUASA	14
18.0	PENUTUP	14

Perutusan

PEGAWAI INTEGRITI MAIM



Assalamualaikum Warahmatullahi Wabarakatuh

Salam Sejahtera, Salam Integriti dan Salam Melakaku Maju Jaya, Rakyat Bahagia, Menggamit Dunia

Alhamdulillah, syukur ke hadrat Illahi dengan limpah kurnia serta izin-Nya, kita dapat membangunkan Polisi Pemberian dan Penerimaan Hadiah, Majlis Agama Islam Melaka (MAIM) yang bertujuan untuk memberi panduan kepada semua warga MAIM yang berurusan dengan pihak luar mengenai pemberian dan penerimaan hadiah/tajaan dalam melaksanakan urusan rasmi dengan penuh integriti seterusnya meningkatkan imej MAIM.

Polisi ini dibangunkan selaras dengan pelaksanaan *Anti-Bribery Management Systems* (ABMS) dalam pengurusan MAIM. Polisi ini penting bagi memberi kesedaran dan pemahaman tentang tatacara pemberian dan penerimaan hadiah yang betul bagi mengelakkan penularan persepsi negatif dan prasangka buruk masyarakat terhadap Kerajaan dan penjawat awam khususnya.

MAIM sentiasa berusaha untuk memastikan khidmat dan urusan berkaitan dapat dilaksanakan dengan tahap integriti yang tinggi, berkesan dan cemerlang. Sebagai satu Agensi Agama Islam yang dekat dengan rakyat, adalah amat penting untuk kita memastikan imej yang bersih dan persepsi positif terhadap Jabatan ini sentiasa terjaga dan tidak menimbulkan syak wasangka terutama sekali berkaitan urusan penerimaan hadiah.

Oleh yang demikian, saya berharap agar garis panduan ini dapat digunakan oleh warga MAIM dan semua pihak berkepentingan bagi menjaga nama baik Jabatan dan perkhidmatan awam.

"Upgrade Iman, Upgrade Integriti"

Sekian, salam hormat.

MOHD RIZALMAN BIN SYED
Pegawai Integriti,
Majlis Agama Islam Melaka



1.0 LATAR BELAKANG

Amalan memberi dan menerima hadiah telah menjadi budaya dalam masyarakat malah ianya amat sukar dibendung tanpa kawalan oleh pihak atasan. Walaupun ianya bertujuan bagi melahirkan rasa terima kasih, persahabatan dan persaudaraan, namun maksud sebenar amalan ini amat sukar diterjemahkan. Jika dikaitkan dengan tugas rasmi harian, perkara ini berkemungkinan menjurus ke arah penyalahgunaan kuasa yang boleh diinterpretasikan sebagai rasuah. Akibatnya adalah akan menjejaskan integriti dan imej MAIM.

Dalam usaha meningkatkan integriti, satu garis panduan mengenai pemberian dan penerimaan hadiah diwujudkan agar pelaksanaan tugas rasmi harian dijalankan dengan telus di kalangan kakitangan MAIM.

2.0 KENYATAAN POLISI

Pekeliling Perkhidmatan Bilangan 3 Tahun 1998, Surat Pekeliling Perkhidmatan Bilangan 5 Tahun 2008, Peraturan-Peraturan Pegawai Awam (Kelakuan dan Tatatertib) 1993 dan PP Bil 17/2000 Pemakaian Akta Badan-Badan Berkanun (Tatatertib dan Surcaj) 2000 (Akta 605).

3.0 TUJUAN

- 3.1 Sebagai rujukan dan makluman mengenai Polisi Pemberian dan Penerimaan Hadiah di kalangan kakitangan MAIM dan pihak-pihak yang berurusan dengan kakitangan MAIM.
- 3.2 Meningkatkan integriti di kalangan kakitangan MAIM dan seterusnya meningkatkan imej MAIM.

4.0 DEFINISI

4.1 Hadiah termasuklah :

- Wang;
- Harta alih dan harta tidak alih;
- Kenderaan;
- Tambang percuma;
- Pakej percutian;
- Saham;
- Tiket loteri;
- Baucar Tunai;
- Kemudahan perjalanan sama ada di dalam atau luar Negara;
- Hiburan seperti tiket wayang, tiket karaoke dan sebagainya;
- Perkhidmatan seperti spa, rawatan muka dan sebagainya;
- Keahlian kelab seperti kelab golf dan sebagainya;
- Sebarang bentuk diskaun/ komisyen;
- Hamper termasuk makanan atau kosmetik;
- Barang kemas seperti cincin, gelang, rantai emas dan sebagainya;
- Sebarang pemberian, cenderamata atau benda bernilai;
- Keraian;
- Telefon bimbit/ barang elektronik;
- Apa-apa benda yang bernilai yang diberi kepada diterima pegawai itu; dan
- Apa-apa pemberian, cenderamata, atau apa-apa benda yang bernilai yang diberi kepada atau diterima oleh pegawai itu, isterinya atau mana-mana orang lain bagi pihaknya daripada mana-mana orang, dengan tiada balasan (*without consideration*) atau balasan yang diketahui oleh pegawai itu tidak mencukupi ataupun mencukupi.

4.2 Tajaan

Merujuk kepada sebarang sumbangan yang diterima dari pihak lain yang diberikan untuk menjayakan projek atau program MAIM.

4.3 Kakitangan MAIM

Semua Pegawai dan Kakitangan lantikan MAIM.

4.4 Orang-Orang Lain

Merujuk kepada :

- Isteri/ Suami;
- Ibu bapa kandung dan ibu bapa mentua;
- Anak-anak termasuk anak angkat yang sah di sisi undang-undang; dan
- Mana-mana orang lain bagi pihaknya.

4.5 Emolumen

Segala saraan dalam bentuk wang yang kena dibayar kepada kakitangan MAIM termasuklah gaji pokok, elaun tetap, bayaran insentif dan elaun bulanan lain.

4.6 Suapan

Suapan boleh datang dalam pelbagai bentuk samada dalam bentuk wang, hadiah, pinjaman, fi, alang, cagaran berharga, harta atau kepentingan mengenai harta, iaitu apa-apa jenis harta, sama ada alih atau tak alih, faedah kewangan, atau apa-apa manfaat yang seumpama seperti yang dinyatakan dalam Bahagian 1 - Permulaan, Seksyen 3, Tafsiran Akta Suruhanjaya Pencegahan Rasuah Malaysia 2009.

4.7 Ketua Jabatan

Setiausaha Majlis Agama Islam Melaka (MAIM)

5.0 SKOP

Polisi ini diguna pakai oleh semua kakitangan MAIM sepanjang tempoh perkhidmatannya dengan MAIM dan termasuk pihak-pihak yang berurusan dengan kakitangan MAIM.

6.0 LARANGAN PEMBERIAN DAN PENERIMAAN HADIAH

Kakitangan MAIM dilarang daripada menerima dan memberi hadiah sekiranya berkaitan dengan pelaksanaan tugas rasminya dan/atau bentuk, amaun atau nilai hadiah itu tidak sepadan dengan maksud hadiah itu diberi. Kaedah yang melarang kakitangan MAIM memberi dan menerima hadiah adalah di bawah Peraturan-Peraturan Pegawai Awam (Kelakuan dan Tatatertib) 1993 seperti berikut:-

Peraturan-Peraturan Pegawai Awam (Kelakuan dan Tatatertib) 1993 di bawah klausa 8 (l)

“Tertakluk kepada peruntukan peraturan ini, seseorang pegawai tidak boleh menerima atau memberi, atau tidak boleh membenarkan isteri dan suaminya atau mana-mana orang lain untuk menerima atau memberikan bagi pihaknya, secara langsung atau tak langsung, apa-apa hadiah (sama ada dalam bentuk zahir atau selainnya) daripada atau kepada mana-mana persatuan, badan, orang atau kumpulan orang jika;

- a) penerimaan atau pemberian hadiah itu mempunyai kaitan, dengan apa-apa cara, dengan pelaksanaan tugas awam pegawai itu; dan*
- b) bentuk, amaun atau nilai hadiah itu tidak sepadan dengan maksud hadiah itu diberikan.”*

7.0 HADIAH YANG BOLEH DITERIMA OLEH KAKITANGAN MAIM DENGAN KEBENARAN

Dalam keadaan tertentu, kakitangan MAIM dibenarkan menerima pemberian hadiah tertakluk kepada kelulusan Setiausaha MAIM. Perkara ini diperuntukkan di bawah :

Peraturan-Peraturan Pegawai Awam (Kelakuan dan Tatatertib) 1993 di bawah klausa 8.(4) (a) dan (b)


“Jika-

- a) Seseorang pegawai berasa ragu-ragu tentang sama ada bentuk, amaun, atau nilai hadiah yang diterima olehnya adalah sepadan dengan maksud hadiah itu diberikan; atau*
- b) Hal keadaan menyebabkan sukar bagi seseorang pegawai untuk menolak sesuatu hadiah atau cenderamata yang bernilai, yang penerimaannya dilarang oleh peraturan ini,*

“Maka hadiah itu boleh diterima secara rasmi tetapi pegawai itu hendaklah, dengan seberapa segera yang praktik, mengemukakan sesuatu laporan bertulis kepada Ketua Jabatan yang mengandungi perihalan lengkap dan anggaran nilai hadiah dan dalam hal keadaan yang hadiah itu diterima”.

8.0 BENTUK, AMAUN ATAU NILAI HADIAH SEPADAN ATAU TIDAK DENGAN MAKSUD IANYA DIBERI

- 8.1 Penerimaan hadiah wajar mengambilkira bentuk, amaun atau nilai hadiah yang diterima agar tidak menimbulkan sebarang syak wasangka bagi dirinya atau orang lain.




8.2 Dalam keadaan penerimaan hadiah tidak berkaitan dengan tugas kakitangan MAIM, maksud bentuk, amaun atau nilai hadiah itu sepadan atau tidak dengan tujuan hadiah itu diberi, hendaklah berdasarkan kepada nilai semasa hadiah itu, “occasion” dan tujuan atau maksud hadiah itu diterima.

8.3 Penerimaan hadiah oleh Kakitangan MAIM yang tidak berkaitan dengan tugasnya, sama ada sepadan atau tidak dengan maksud ianya diberi adalah seperti berikut :

a) Penerimaan hadiah dianggap tidak sepadan dengan maksud hadiah itu diberi jika nilai semasa hadiah diterima itu nilainya (dalam bentuk wang) melebihi $\frac{1}{4}$ emolumen bulanan atau melebihi **RM500.00** mana yang lebih rendah. Dalam hal ini penerimaan hadiah itu hendaklah dilaporkan kepada Setiausaha MAIM untuk kelulusan menggunakan borang di **Lampiran A**.

b) Penerimaan hadiah dianggap sepadan dengan maksud hadiah itu diberi dan tidak perlu melaporkan kepada Setiausaha MAIM untuk kelulusan, jika nilai hadiah yang diterima kurang $\frac{1}{4}$ emolumen atau **RM500.00**, mana yang lebih rendah. Disamping itu, penerimaan hadiah dianggap sepadan dengan maksud hadiah itu diberi walaupun nilainya melebihi **RM500.00**, jika penerimaan hadiah itu dalam keadaan berikut:

- Penerimaan hadiah daripada rakan sekerja sempena persaraan, pertukaran, pertunangan dan perkahwinan kakitangan MAIM;
- Penerimaan hadiah daripada isteri atau suami, anak-anak termasuk anak menantu atau anak angkat yang sah dari segi undang-undang, ibu/bapa termasuk ibu mertua dan bapa mertua dan adik beradik termasuk sebelah isteri atau suami;
- Penerimaan hadiah daripada saudara-mara dan rakan-rakan sempena majlis hari lahir, pertunangan dan perkahwinan pegawai



atau anak-anak, atau apa-apa majlis lain yang berkaitan dengan adat resam dan agama; atau

- Penerimaan hadiah yang cepat rosak dan tidak tahan lama seperti makanan, buah-buahan, kuih muih, minuman ringan, bunga dan sebagainya.


8.4 Walaubagaimanapun, sekiranya kakitangan MAIM masih ragu-ragu dan mendapati penerimaan ini boleh menimbulkan masalah berkaitan dengan tanggungjawab atau boleh menimbulkan syak wasangka bagi dirinya atau orang lain, maka kakitangan MAIM boleh melaporkan penerimaan ini kepada Setiausaha MAIM atau ditolak hadiah berkenaan dengan cara yang baik dan berhemah.

*Rujukan : Pekeliling Perkhidmatan Bilangan 3 Tahun 1998
Garis Panduan Pemberian dan Penerimaan Hadiah Di Dalam Perkhidmatan Awam
No. Siri : 0016, JPA(S)TT.71/69 Jld. 3 (7)*

9.0 PENERIMAAN HADIAH YANG SUKAR DITOLAK

9.1 Semasa menjalankan tugas, kadangkala sukar untuk kakitangan MAIM menolak pemberian hadiah kerana jika menolak pemberian itu akan memalukan si pemberi atau menimbulkan keadaan serba salah. Ini misalnya :

- a) Semasa menjalankan tugas di seminar, simposium, kursus atau mana-mana majlis rasmi di peringkat negeri atau antarabangsa, pihak penganjur tidak memberitahu pemberian hadiah terlebih dahulu; atau
- b) Semasa menjalankan tugas rasmi di daerah atau kampung di mana masyarakat atau pemimpin di peringkat kampung atau daerah memberi buah-buahan, sayur-sayuran dan hasil kerja tangan penduduk kampung dan sebagainya.



9.2 Dalam keadaan sukar untuk menolak pemberian hadiah yang ada kaitan dengan tugas rasmi, kakitangan MAIM dibenarkan menerima hadiah berkenaan dan kemudiannya sekembalinya di pejabat, kakitangan MAIM hendaklah melaporkan kepada Setiausaha MAIM untuk kelulusan sewajarnya.


9.3 Walau bagaimanapun, bagi memudahkan urusan pentadbiran, kakitangan MAIM dikehendaki hanya melaporkan sahaja kepada PSU Bahagian/ Ketua Seksyen/Ketua Unit tanpa perlu kelulusan Setiausaha MAIM, jika pemberian hadiah yang sukar ditolak itu:

- a) Nilainya kurang daripada **RM500.00**;
- b) Berbentuk lencana (*“plaque”*), *“pennant”*, produk-produk asnaf atau apa-apa bentuk bahan atau barangan bercetak yang berkaitan dengan Jabatan tersebut dan bertujuan untuk promosi Jabatan atau negara.

10.0 PENERIMAAN HADIAH YANG MENJADI KESALAHAN

10.1 Walau bagaimanapun, penerimaan hadiah itu, sama ada kurang atau lebih dari nilai yang dinyatakan atau sama dengan nilai tersebut, adalah menjadi kesalahan di bawah undang-undang jika ia di terima dalam keadaan berikut :


- a) Hadiah itu diterima atau diminta secara atau dengan niat rasuah (*corruptly or with corrupt intention*) bahawa ia adalah dorongan atau upah kepada kakitangan MAIM itu bagi melakukan atau tidak melakukan (*to forebear*), atau kerana telah melakukan atau telah tidak melakukan sesuatu perbuatan berhubungan dengan hal ehwal atau urusan prinsipalnya atau dalam menjalankan kerja-kerja rasminya (Seksyen 9 dan 10, Akta Pencegahan Rasuah 1997, Seksyen 161 dan 162, Kanun Keseksaan);

- 
- b) Orang yang memberi hadiah itu mempunyai perhubungan dengan kerja-kerja rasmi kakitangan MAIM itu sendiri atau dengan kerja rasmi seseorang kakitangan MAIM yang di bawahnya dia bekerja dan pemberian serta penerimaan itu tidak dibuat dengan suci hati (*not in good faith*), sebaliknya ia dilakukan dengan satu niat jenayah (*mens rea*); atau
 - c) Hadiah itu diterima dengan niat jenayah (*mens rea*) daripada seseorang, yang kakitangan MAIM itu ketahui telah, atau sedang, atau mungkin ada kena mengena dalam apa-apa urusan yang telah dijalankan, atau yang akan dijalankan oleh pegawai itu (Seksyen 165, Kanun keseksaan).

11.0 PENAJAAN DARI PIHAK SWASTA UNTUK MAIM

11.1 Penajaan dari pihak swasta/mana-mana pihak lain adalah dibenarkan dengan syarat, kebenaran diperolehi daripada Setiausaha MAIM tertakluk kepada syarat-syarat seperti berikut :

- a) Tajaan yang diterima hendaklah diberikan oleh penaja secara percuma tanpa sebarang syarat dan ikatan. Penaja pula tidak mempunyai apa-apa kepentingan dengan MAIM.
- b) Sesuatu tajaan itu diberikan oleh penaja secara sukarela dan bukan atas permintaan MAIM. MAIM adalah dilarang menjalankan usaha bagi mendapatkan tajaan atau derma dari mana-mana pihak sama ada pertubuhan atau orang perseorangan kecuali program/aktiviti kerjasama yang melibatkan pihak luar mengenai kebajikan dan bencana yang tiada kaitan perniagaan dengan MAIM.
- c) Tajaan yang diberikan itu juga hendaklah digunakan mengikut apa yang dihasratkan oleh penaja.

- 
- d) Tajaan yang diterima juga hendaklah diambil kira dari segi jumlah dan kekerapan tajaan tersebut diterima.

12.0 PENERIMAAN HADIAH DAN SUMBANGAN OLEH KELAB KEBAJIKAN DAN REKREASI (KADAR)

- 12.1** KADAR MAIM adalah tidak dibenarkan menghubungi terus atau secara langsung syarikat-syarikat swasta atau orang awam untuk mendapatkan bantuan kewangan dengan apa cara sekalipun bagi membiayai aktiviti-aktiviti mereka.
- 12.2** Walau bagaimanapun, apa-apa sumbangan yang hendak disumbangkan kepada KADAR MAIM oleh syarikat-syarikat swasta dan orang awam hendaklah disalurkan kepada Majlis Kebajikan dan Sukan Anggota-anggota Kerajaan Malaysia (MAKSAK). KADAR MAIM bolehlah membuat permohonan kepada Majlis Kebajikan dan Sukan Anggota-Anggota Kerajaan Malaysia bagi mendapatkan peruntukan masing-masing.
- 12.3** Perlulah ditegaskan bahawa, apa-apa sumbangan yang diperolehi hendaklah dipastikan tiada unsur-unsur paksaan, tidak menimbulkan syak dan keraguan dan beban kepada mana-mana pihak agar ianya tidak mencemarkan nama baik MAIM dan Perkhidmatan Awam keseluruhannya.
- 12.4** Sumbangan yang diterima juga hendaklah diambil kira dari segi jumlah dan kekerapan sumbangan tersebut diterima.
- 12.5** Sumbangan yang diterima hendaklah digunakan untuk tujuan aktiviti-aktiviti kelab berkenaan dan hendaklah mempunyai penyata kira-kira yang boleh dirujuk.



13.0 PUNGUTAN DERMA OLEH KESATUAN/PERTUBUHAN

- 13.1 Kutipan derma oleh kesatuan/ pertubuhan yang berdaftar yang melibatkan atau dikendalikan oleh pegawai awam atau Jabatan Kerajaan adalah tertakluk kepada Akta Pungutan Rumah ke Rumah dan Dijalan, 1947 (Akta 200), Surat Pekeliling Am Bil. 6 Tahun 1987 dan mana-mana akta/ undang-undang peraturan yang dikeluarkan oleh pihak-pihak yang berkenaan.
- 13.2 MAIM adalah tidak dibenarkan menghubungi terus atau secara langsung syarikat-syarikat swasta atau orang awam untuk mendapatkan bantuan kewangan dengan apa cara sekalipun bagi membiayai aktiviti-aktiviti mereka.
- 13.3 Walau bagaimanapun, apa-apa sumbangan yang hendak disumbangkan kepada KADAR MAIM berkaitan kutipan derma dari kalangan kakitangan MAIM dan orang luar bagi tujuan kebajikan dan bencana hendaklah dipastikan tiada unsur-unsur paksaan, tidak menimbulkan syak dan keraguan dan beban kepada mana-mana pihak agar ianya tidak mencemarkan nama baik MAIM dan Perkhidmatan Awam keseluruhannya.
- 13.4 Sumbangan yang diterima juga hendaklah diambil kira dari segi jumlah dan kekerapan sumbangan tersebut diterima hendaklah digunakan untuk tujuan aktiviti- aktiviti kelab berkenaan dan hendaklah mempunyai penyata kira-kira yang boleh dirujuk.




14.0 KEPUTUSAN SETIAUSAHA MAIM

14.1 Setiausaha MAIM apabila menerima laporan mengenai penerimaan hadiah oleh kakitangan MAIM yang memerlukan keputusannya, boleh membuat keputusan seperti berikut :

- a) Membenarkan kakitangan MAIM menerima hadiah itu;
- b) Mengarahkan kakitangan MAIM mengembalikan hadiah itu kepada si pemberi; atau
- c) Hadiah itu disimpan oleh MAIM.

14.2 Setiausaha MAIM semasa menimbangkan permohonan kakitangan MAIM hendaklah melihat kriteria-kriteria seperti berikut:

- a) Hendaklah memastikan hadiah yang diterima itu dibenarkan di bawah garis panduan ini;
- b) Penerimaan hadiah itu tidak menimbulkan syak kakitangan MAIM telah menggunakan kedudukannya atau kuasa yang ada padanya untuk memperolehi hadiah itu;
- c) Mengambil kira kekerapan kakitangan MAIM tersebut menerima hadiah;
- d) Hubungan antara kakitangan MAIM dengan si pemberi hadiah tersebut, khususnya mengenai tugas-tugas dan kuasa yang ada kepada kakitangan MAIM itu; dan
- e) Kepentingan MAIM secara keseluruhan.



14.3 Kakitangan MAIM yang telah menerima hadiah daripada mana-mana pihak atau orang luar, perlu melaporkan penerimaan hadiah tersebut melalui **Borang Permohonan Bagi Mendapatkan Kebenaran Penerimaan Hadiah di Bawah Peraturan 8 Peraturan-Peraturan Pegawai Awam (Kelakuan dan Tatatertib) 1993, Pekeliling Perkhidmatan Bilangan 3 Tahun 1998 (Lampiran A) dan Buku Log Penerimaan Hadiah.**

14.4 Sekiranya Setiausaha MAIM yang telah menerima hadiah daripada mana-mana pihak atau orang luar, perlu melaporkan penerimaan hadiah tersebut dalam Mesyuarat Khas yang ditubuhkan atau Mesyuarat Profesional Pengurusan Pentadbiran (M3P) MAIM sebagai kawalan dalaman sekiranya berlaku.

15.0 TANGGUNGJAWAB PSU BAHAGIAN/ KETUA SEKSYEN/ KETUA UNIT

15.1 PSU Bahagian/ Ketua Seksyen/ Ketua Unit boleh meminta kakitangan MAIM memberi penjelasan sekiranya meragui apa-apa hadiah yang diterima.

15.2 PSU Bahagian/ Ketua Seksyen/ Ketua Unit juga hendaklah melaporkan kepada Jawatankuasa Tatatertib MAIM atau Mesyuarat Khas yang ditubuhkan atau Mesyuarat Profesional Pengurusan Pentadbiran (M3P) MAIM atau mana-mana pihak berkuasa lain, sekiranya terdapat apa-apa pelanggaran terhadap apa-apa peraturan atau undang-undang berkaitan penerimaan hadiah oleh kakitangan MAIM.

16.0 PEMBERIAN CENDERAHATI DARIPADA MAIM KEPADA PIHAK LUAR

16.1 MAIM boleh memberikan cenderahati kepada pelawat/pelanggan/orang awam/pewakaf.

16.2 Cenderahati yang boleh diberikan adalah Produk Korporat MAIM.



17.0 TARIKH KUATKUASA


17.1 Prosedur ini merupakan punca kuasa untuk Unit Integriti menjalankan tugas pengurusan aduan Unit Integriti dan ia berkuatkuasa mulai tarikh ia dikeluarkan.

18.0 PENUTUP

Pemberian dan penerimaan hadiah perlulah mematuhi undang-undang atau peraturan yang telah berkuatkuasa. Kegagalan mematuhi undang-undang dan peraturan boleh memberi persepsi negatif dan mencemarkan nama baik MAIM.

Sekiranya timbul sebarang kemusykilan berhubung pemberian dan penerimaan hadiah, rujukan hendaklah dibuat kepada Setiausaha MAIM atau Pegawai Integriti MAIM untuk mendapatkan pencerahan.

Diharap garis panduan ini akan menjadi rujukan yang efektif dan berkesan ke arah meningkatkan integriti di kalangan kakitangan MAIM.



UNIT INTEGRITI, MAJLIS AGAMA ISLAM MELAKA
Kompleks Pusat Islam, Bukit Palah, 75400, Melaka.

Telefon : 06 - 283 7416 | E-mel : integriti@maim.gov.my | Faksimile : 06 - 288 2792